

Communicaziun allas medias digl cumegn da Surses (nr. 01-2024)

Surses: Opziuns d'ager conc. l'utilisaziun futura dalla forza hidraulica per igl cumegn
Igl cumegn d'urna Surses ò nego la dumonda dad ewz da renovar avant taimp las concessiuns digl dretg dallas avas existentas per las ovras electricas Tinizong e Nandro, tgi scadan igl 2035. Uscheia dispona igl cumegn da tot las opziuns d'ager an connex cun las proximas tractativas davart igl return agl proprietari dallas ovras electricas. Pinavant ò igl suveran approvo tant igl credit per la construcziun nova dalla tgesa da scola primara Grava scu er igl credit per la construcziun simultana d'ena halla da parcar.

A caschung dalla votaziun all'urna on igls votants e las votantas digl cumegn da Surses - sen proposta dalla radunanza communal - decida cun clera maiortad da negar la dumonda dall'Ovra electrica digl cumegn da Surses da renovar avant taimp las concessiuns digl dretg dallas avas existentas per las ovras electricas Tinizong e Nandro. Uscheia stattan davertas agl cumegn, an collaboraziun cun igl cantun Grischun, tot las opziuns ainten las tractativas futuras cun ewz pertutgont igl return agl proprietari digls implants electricas Tinizong e Nandro.

Igl cumegn ed igl cantun Grischun on ossa damai d'examinar e decider scu tg'ins vot reglar an futur l'utilisaziun dalla forza hidraulica digls implants existents Tinizong e Nandro dad ewz. Las suandontas opziuns d'ager èn pusseblas:

- Atgna utilisaziun ansemen cun igl cantun Grischun
- Nova concessiun cun igl concessiunari actual, vot deir cun ewz
- Concessiun nova cun en nov concessiunari

Per examinar chesta dumonda complexa ed impurtanta è neida installada ena „cumischung da return agl proprietari“, tgi sa cumpona da represchentants digl cumegn da Surses, digl cantun Grischun, digl cumegn d'Albula/Alvra scu er da cunsiglieders externs.

Chella moda da proceder digl cumegn da Surses an connex cun la nova regulaziun digls dretgs d'utilisaziun corresponda alla strategia concernent la forza hidraulica digl cantun Grischun, scu tgi el ò formulò igl onn 2022 cun dar en'igleida sen tot igls implants hidraulics sen territori cantunal, risguardond las situaziuns d'interess digls cumegns. Per tala raschung benevainta la Regenza grischuna la decisiun digl cumegn da Surses. Igl cumegn precischescha, tgi la decisiun negativa na seia betg drizzada cunter ewz, perchegl tgi ewz seia sto adegna en partenari fido e fair.

Credit per la construcziun nova dalla tgesa da scola primara a Savognin e construcziun d'ena halla da parcar

Igl cumegn d'urna Surses ò approvo cun clera maiortad tant igl credit d'impegn da radond 22 miu. francs per la construcziun nova dalla tgesa da scola primara Grava incl. la sanziun parziala digl edifezi polivalent a Savognin scu er igl credit da radond 2 miu. francs per la construcziun simultana d'ena halla da parcar sot la piazza da scola.

Siva tgi la radunanza communal è s'exprimeida igl 2021 per igl li da scola actual a Grava, è neida publitgeida ena concorrenza d'architectura per la construcziun nova dalla „Scola Grava“. Chella concorrenza ò gudagnea la ARGE Ruch & Partner Architekten / RBA Architekten, Son Murezza, tgi ò siva er elaborò igl project da construcziun per incumbensa digl cumegn.

Cun la construcziun nova dalla tgesa da scola vignan eliminòs igls deficits dall'infrastructura da scola tgi èn ancunaschaints gio dadei scu er las immissiuns da radon dalla tgesa da scola. Cun las maseiras preveidas ègl er pussebel da realisar furmas d'amprender modernas. Uscheia so



neir reagea sen las sfeidas futuras tant an risguard pedagogic scu er agl domber da scolaras e scolaras carschaint. An cumbinaziun cun la construcziun nova dalla tgesa da scola vign sano igl madem mument igl edifezi polivalent tgi sa catta segl areal dalla scola. Cun la construcziun simultana d'ena halla da parcar sot la piazza da pôssa vign mitigeida la problematica da parcadis ainten la zona Grava.

Igl 2013 è neida decideida la fusiun dallas scolas an Surses. Igl è nia decidia da manar la scola da moda centrala a Savognin. La tgesa da scola primara a Savognin datetscha digl onn 1954 e na corresponda betg ple allas pretensiuns dad ozande.

Infurmaziuns:

Daniel Wasescha, mastral (079 709 24 28 u daniel.wasescha@surses.ch)

Tinizong, 22. Januar 2024